

# Mascaruba cu "Chispa di Candela"

ORANJESTAD (AAN) - Cumpliendo ya pa 27 aña cu e pueblo Arubano, Mascaruba lo ta un biaha mas den "Cas di Cultura" den luna di September pa deleita e pueblo cu un obra alegre den tres acto di e famoso escritor Noel Coward. E obra original yama "Private Lives" y el a ser traduci como "Chispa di Candela" pa Sra. Filomena

Wever-Schwengle.

Si bo ta pensa pa divorcia, mihor bay wak e obra teatral aki pa realisa kico un chispa ainda por haci den un matrimonio. Bo sa cuanto dolor e ta causa ora bo mira un persona cu ainda bo ta stima un tiki den braza di otro? No?

Wel, bay wak e obra den Cas di Cultura diana 16, 17, 18, 23,

24 y 25 di September venidero pa 8.30 p.m. pa comproba pa bo mes.

E obra ta ser dirigi pa e incansable criollo Oslin Boekhoudt, mihor conoci como Chin, kende den mundo di teatro no tin mester di introduccion. Cu e obra aki Chin ta logrando su di 19 obra cu e ta dirigi y un palabra di gradicimiento ta bay di parti di Mascaruba y tambe di henter e pueblo Arubano amante di teatro pa su gran aporte na cultura.

Den e obra aki lo tin actuacionnan di Lourdes Croes como Amanda, Toribio (Tuyo) Croes como Elio, Gina Nuboer como Sylvia, Juan Schwengle como Victor, Ida Croes como Luisa.

Como apuntadora lo fungi Ida Croes y como asistente di direccion Filomena Wever-Schwengle.